

No. 216

佛说大鱼事经

东晋天竺三藏竺昙无兰译

闻如是：

一时婆伽婆在舍卫城，祇树给孤独园。

尔时世尊，告诸比丘：「往昔时，有一水，饶诸大鱼。

「尔时大鱼勅小鱼曰：『汝等莫离此间往他处所，备为恶人所得。』

「尔时小鱼，不从大鱼教，便往至他处所。

「尔时鱼师，以饭网罗线捕诸鱼，诸小鱼见，便趣大鱼处所。

「尔时大鱼见小鱼来，便问小鱼曰：『汝等莫离此间往至他所。』尔时小鱼便答大鱼曰：『我等向者以至他所来。』

「大鱼便勅小鱼曰：『汝等至他所，不为罗网取捕耶？』

「小鱼答大鱼曰：『我等至彼，不为人所捕，然遥见长线寻我后。』

「大鱼便语小鱼曰：『汝等以为所害，所以然者，汝所遥见线寻后来者，昔先祖父母，尽为此线所害，汝今必为所害，汝非我儿。』

「尔时小鱼，尽为鱼师所捕，举着岸上，如是小鱼、大鱼有死者，此亦如是。

「或有一比丘，在他聚落游行，着衣持钵，周行乞食，福度众生；不守护身，不守护口意，不具足诸根，意不专一。

「即于彼村落乞食，时见诸女人端正无双，色犹桃华，见已便起淫心，以此淫心，身口意炽然。

「彼以身口意炽然，即于村落乞食，还所止处，故发欲想。

「便往尊比丘所，以此因缘，具向诸比丘说。

「诸尊大比丘，告此比丘言：『汝起淫想，此不为净。汝比丘！当恶露观。』

「尊大比丘，语复至再三。

「尔时彼比丘，身口意炽盛，复至彼村落乞食，遥见女人端正无比，色犹桃华，见已便起淫心，以此淫心，身口意炽然，彼以身口意炽然故，即于彼村落乞食已，还所止处，往尊大比丘所，以此因缘，具向诸比丘说。

「彼尊比丘，告此比丘言：『汝往，非我众中比丘。』

「尔时此比丘不舍禁戒，便着俗服，乐爱欲中，是谓比丘魔得其便，随波旬所欲，亦不脱生老病死愁忧苦恼。如是诸比丘利养具，甚为难，甚为苦，甚为恐惧，堕入恶趣，不生无上处。」

「是故，诸比丘！当作是学，已得利养当舍离之，未得利养不起贪意，如是诸比丘当作是学。」

尔时诸比丘闻佛所说，欢喜奉行。

大鱼事经

【经文信息】大正藏第 04 册 No. 0216 大鱼事经

【版本记录】CBETA 电子佛典 Rev. 1.9 (Big5)，完成日期：2009/04/23

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，维习安大德提供之高丽藏 CD 经文，北美某大德提供，CBETA 提供新式标点

【其他事项】本数据库可自由免费流通，详细内容请参阅【中华电子佛典协会数据库版权宣告】
